

Dapli daners per la «vatga sontga» – la viafier

Il cumbat per las finanzas da traffic cuntinua

■ **(anr/vi) Ils votants lubeschan il nov fond per financiar en l'avegnir la viafier. Ma la discussiun cuntinua: Suen-ter il cler resultat a favur dal traffic public pretendan las organizaziuns d'automobilists uss er in fond per las vias.**

Ils politichers da traffic vegnan strusch da trair flad. Suen-ter ch'il project per la viafier – cun in augment da quatter sin tschintg milliardas francs – fiss sut tetg fan ils adversaris squitsch. Sco la viafier stoppia era l'infrastructura da las vias vegnir adattada. «Era la via dovra uss in fond», ha ditg cusseglier naziunal *Walter Wobmann* (pps/SO) ier suenter la votaziun. «Igl è noss dretg ch'era las vias vegnan bajegiadas ora.»

Vatgas sontgas ed automobilists mulschids

En quel senn vegnian ins a promover l'iniziativa «ils automobilists vegnan mulschids» (Milchkuhinitiative). Quella vul impedir che las taxas e taglias d'automobilists vegnan «malduvradas» per il traffic public.

La viafier saja ina vatga sontga en Svizra, ha ditg *Wobmann*. Perquai hajan ils adherents gè simpel da gudagnar la votaziun dad ier.

Anc betg decidì èsi sch'i dat in referendum encunter la lescha che diminuescha la deducziun da taglia per pendularis-automobilists.

Er il TCS ha pretendì ier da stgaffir analog a la viafier in fond per financiar las vias. L'Astag ha punctuà ch'ins stoppia eliminar las vias stuppadas en tuttas regiuns svizras. Ins stoppia exnum agir

en la Bassa, sco per exempel en las regiuns da Geneva e Losanna, Turitg, Basilea e Lugano.

Il triumf dals adherents

«Per ils votants ha il svilup dal traffic sin rodaglias clermain emprima prioritad», ha ditg cusseglier naziunal *Roger Nordmann* (ps/VD). Il resultat dad ier stettia en cler contrast cun il «na» tar la vignetta pli chara per l'autostrada. La differenza tar la votaziun dal november saja sorprendenta.

«Jau sun tut inchantà da l'entusiassem dals Svizzers per il traffic sin rodaglias», ha ditg *Normann* pertutgant il cler resultat dad ier. I sa tractia d'in gea persvada – d'in «triumf».

Tuttina giaja la lavur vinavant: «Nus vegnin a stuair ans defender encunter augments stravagads dals pretschs da bigliets.» Sch'i daventia pli char dad ir cun tren giaja la gliעד puspè pli savens cun auto.

Ils plans per in fond per financiar las vias vegnian ins ad examinar «senza pregiudizis», ha sincerà *Nordmann* ch'è medemamain vicepresidente dal VCS. «Nus n'essan betg en general encunter d'engrondir la rait da vias.» Oravant tut stoppian ins discutir da cumplettrar las vias en las aglomeraziuns.

Er ils Grischuns han beneventà la finanziaziun da l'infrastructura da viafier: 184 719 votants han ditg gea e 138 389 han ditg na.



Ils votants lubeschan il nov fond per financiar en l'avegnir la viafier.